



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

Mizoram: Meth tablets seret 2
bener Tripura nungner ana apu

Opposition teloktep ajanga PM
Modi shisabulur: Nitish Kumar



VOL. XX NO. 306 (ADOK 306)

DIMAPUR ROGONÜ (FRIDAY)

LUROI (AUGUST) 18, 2023

₹ 5.00

NSCN/GPRN Parliamentarian shisadokden senden amen

Dimapur, Luroi/August 17 (TYO): Steering Executive Members, Steering Committee Members, Kilonsers, Dy.Kilonsers aser Ao, Lotha aser Naga Rengma Hills (CAA) nungi Tatar tem aliba NSCN/GPRN Parliamentarian tem shisadokden senden ka August 17, 2023 nü Hotel Saramati, Dimapur nung mena liasü.

Iba senden ya "Nagalim for Christ" yimiyim nung National Socialist Council of Nagalim (NSCN) kübok Naga political movement nung rangloker mena liasü, ta NSCN/GPRN sangdong ka ajanga ashi.

Iba yimiyim ajanga NSCN züngsemtem ajungmesor, telungjem aser tesendaktep lidaktsür.

Naga nungeri takum bendanga agütsüba tanüla aser

NSCN tasütait tanüla molungsentsü iba yimiyim nungi angur, ta sangdong ajanga ashi.

Kodanga metoktsütsü temolungtetba kübok NSCN-i 1997 nungi tenzüka Indo-Naga yimten ken o jembiba mapang tasü ita nokdaka arur aser süngjang tajung tanga August 3, 2015 nung Framework Agreement zülutepa liasü, ta ashi.

Naga nungner aser Naga lima indang ayak tejangja sayutetsü asoshi kanga saka aazükba nung nokdaksü temolungtetba züngsem temi tasü ita lemsatp.

Iba senden nungsa Manipur nung Meitei aser Kuki-Zo kin tsüngta azüdokshiba indanga süoka jembiba aser asen lima aser asen ayimten ayak kumzüka ayuts asoshi tali saksalema alitsü pangjemtep, ta sangdong ajanga ashi.

Manipur governor-i CRPF dang state tensa azüoktsü tuyu

Imphal, Luroi/August 17 (Agencies): Brehostibarnü Manipur Governor Anusuiya Uikey-i CRPF (Manipur & Nagaland sector) indang Inspector General Sandeep Dutta dang state nung tekeraba nung yimjung tanaben lidaktsütsü asoshi mera agütsü totuyuba agütsü.

Manipur governor-isa state nung internally displaced people (IDPs) asoshi teyari meshia liasü.

CRPF Manipur aser Nagaland sector indang Inspector General-i August 17, 2023 nü Raj Bhavan, Imphal

nung Governor Anusuiya Uikey ajurua liasü.

Iba mapang CRPF IG ajanga Manipur governor dang state nung paramilitary forces ajanga state nung tensa azüoktsü asoshi mera balala agiba indang osang agüja liasü.

Manipur nung tensa mejungi akumtsüsa aliba tesemtem nung CRPF company kar aser Rapid Action Forces tem yoka lir.

Manipur nung May 3 nü Kuki aser Meitei kin tsüngta mangatetep adokba tanü tashi iba state nung azüdokshi agi sünger nüburttem kanga timtema arutagi.

Manipur rongdok dang BJP mazüngi nübu ayimer: Mallikarjun Kharge

New Delhi, Luroi/August 17 (Agencies): Brehostibarnü Congress tir Mallikarjun Kharge-i BJP aija jembidang, Manipur rongdokdang iba party danga state nung mazüngi nübu yima senzür, ta aitsü.

New Delhi nung aliba Talkatora Stadium nung Mahila Congress züngsem aser party worker tem den jembidang, party nungi tetsür lenurtemi meranga inyaktsü aser 2024 Lok Sabha elections nung BJP sorkar atsüngdoktsü, ta Kharge-i ashi.

"Rahul Gandhi-i Manipur tonga oteter kechiba ato kilonseri-i moteter? Yangji aliba tetsürtem anüksü asoshi BJP-i kechi agüja lir? Parnok kidang nungi jena aor, tashiyim amshia shi nung medemer aser tepseter. Aser BJP danga state tem nung mazüngi nübu yima senzür," ta Kharge-i aitsü.

"Aruya aliba 2024 general elections asoshi asen party nung tetsür temi shisa lemsatapa sentong yanglutsü aser parnoki taruba küm BJP sorkar atsüngdoktsü," ta Kharge-i ashi.

Manipur nung tashiyim mapa balala inyakdang Ato Kilonsar Narendra Modi ola madoki liasü

asere Opposition ajanga no-confidence motion benokba sülen ang pai parliament nung Manipur indang jembiba, ta Kharge-i aitsü.

"Linük tesem ajungalen rongrongshirong lir. Manipur nung mepetmesü atema ato kilonsar dang jembitsü asüngdang, saka onoki no-confidence motion benokba sülen ang jembiba. Nisung takum jenti laluogo, ki aika rongdokogo, Manipur nung nisung meyririjang aika tesem balala nung jenshia lir, saka ato kilonsari iba atema kecha mejembir," ta Kharge-i aitsü.

Party ajak nung inyaker aser lenir temi linük ajungtsü asoshi inyaktsüla, ta pai ashi.

"Iba rara ya senso asoshi lir. Ibai onok kija asoshi masü. Ato Kilonsar Modi-i küm 70 nung nenoki kechi inyak ta jembir, saka tesüiba küm 70 tsüngta Morarji Desai aser Atal Bihari Vajpayee nungeria yimsü süa aruogo. Tesüiba küm 70 tsüngta asenok ajaki democracy takum yutsü," ta pai ashi.

Party nung tetsür lenurtemi meranga inyaktsü nangzüktsüla aser taruba general election nung BJP atsüngdoktsüla, ta paisa ashi.

Kuki-Zo MLA temi hill district tem atema temeja CS aser DGP meshir



Manipur nungi Kuki-Zo MLA ter yagi hill district tem asoshi DGP aser Chief Secretary temeja meshir.

Imphal, Luroi/August 17 (Agencies): Azüdokshi agi raksar aliba Manipur state nungi Kuki-Zo MLA ter, shirnoki taoba mapang tribals atema "separate administration" meshia liasü, parnoki ano Ato Kilonsar Narendra Modi dang ano tezüluba tasen ka agütsüogo.

PM Narendra Modi dangi memorandum tasen ka züluba nung Manipur nungi Kuki-Zo MLA ter yagi state nung hill districts tem asoshi temeja DGP aser Chief Secretary meshia liasü.

Manipur nung aliba hill district pongu atema chief secretary aser DGP (director general of police) mesüra kasa post agütsütsü takhangba agüja Kuki-Zo MLA ter yagi zülua liasü.

Manipur nung hill districts pongu ya Senapati, Tamenglong, Churachandpur, Chandel aser Ukhrul alitsü.

Maneni Manipur nungi Kuki-Zo MLA ter yagi state nung kin balala tsüngda azüdokshiba agi kongshir aliba tribal nisungtem nem teyari agütsütsü asoshi Prime Minister's Relief Fund nungi sen crore 500 agüjang ta takhangba agütsü.

Manipur nungi tribal MLA tem yagi ato kilonsar dang takhangba toku agüja liasü.

Iba memorandum nungya Manipur nungi Kuki-Zo MLA 10-i meyongnem agüja liasü, aser parnoki taoba mapang special state assembly session nung madentsü ta sangdonga liasü.

Manipur nung Kuki-Zo

MLA ter ya Saitu MLA Haokholet Kipgen, Tengnoupal MLA Letpao Haokip, Churachandpur MLA LM Khaute, Kangpokpi MLA Nemcha Kipgen, Tipaimukh MLA Ngursanglur Sanate, Saikot MLA Paolienlal Haokip, Singhat MLA Chinlunthang, Henglep MLA Letzamang Haokip, Saikul MLA Kimneo Haokip Hangshing aser Thanlon MLA Vungzagin Valte alitsü.

Manipur nung Kuki aser Meitei kin tsüngta mangatetep adoka May 3 nungi tenzüka iba state nung azüdokshi aser mepetmesü tulu adoka arur.

Manipur nung ita pezü tashi azüdokshia aruba mapang nisung 150 dak tema takum samaogo aser ano meyririjang aika tesem balala nung jenoka lir.

Kohima traffic tebilemstsü asoshi RTA-i mera agir

Kohima, Luroi/August 17 (TYO): Deputy Commissioner, Kohima, Shanavas C, IAS lenisüba kübok Regional Transport Authority (RTA) Kohima senden ka August 16, 2023 nü DC Kohima indang Conference Hall nung mena yimti nung traffic tebilemstsü tali akumba indang azüoktsü jembishinüa liasü.

Kohima nung gari sadema mesenzütetba aser nüburttemi timtem balala ajuruba tebilemstsü indang lemsatapa iba senden ya amen.

Pilot project ama ward pongu nung "Ward Parking Committees" tentetsü iba senden nung telemtetba agia liasü.

Iba atema SDO (C) Sardar, Kohima ya Convenor asütsü aser DSP (Traffic), RTA nungi ketdangsiir, KMC ketdangsiirtem aser Ward Chairment tem züngsem asütsü lemtet. Item ward nung traffic tajungba nung

ketdang asütsü nükjidong nung iba committee ya shima liasü.

Traffic mesü-menangba ajemdaktsütsü asoshi tendangba ama Kohima Smart City Development Ltd. (KSCDL) multi-level parking facilities tekeraba nungi amshitsü iba senden nung jembiba.

Multi-level car parking facility ana amshitsü asoshi tasa tasen bushitetsü mechi Addl. SP Kohima-i anir tapet department tem nungi züngsem dena committee ka tenteta liasü.

Gari tem anenba tajungba nung ketdangsiir asoshi KSCDL dang Kohima telungi aitba aser tokona tongtipang tesemtem nung high-resolution CCTV camera tem inoktsü ajungshia liasü.

Iba senden nungsa ISBT, Regional Taxi Parking atema feeder passenger vehicle service agütsütsü, kaketshir aser office mapa inyaker atema city bus

service asoshi "Green Channel" jangjatetsü aser Oking Hospital kima aser Jail Colony nung traffic ketdangsiir lepa reprangshitsü onüktem jembiba liasü.

DSP (Traffic) ajanga tang Kohima nung traffic tensa indang PowerPoint presentation agütsüba mapang, nütsüng tali züina akumba, traffic ozüng sülen manidakba aser VIP motorcades densema traffic tebilemstsü adokdaksüba indang lemsatapa liasü.

Kohima nung anogoshi gari 1,95,284 shi senzür, anungji traffic ketdangsiir ya tayongzükba onsara tulu lir.

Iba senden nung ano nüburttem tali nungtepba mapang traffic ketdangsiir, veterinary center ka yanglutsü, kaket reju upgrade asütsü aser nüburttem libaliru yimya tajungba kumdaktsütsü asoshi ki o jen balala yanglutsü onüktema süoka jembiba liasü.

5buba ENWO inti senden menogo



MP, Rajya Sabha, S. Phangnon Konyak-i ENWO Magazine sayatsüba noksa nung angur.

Dimapur, Luroi/August 17 (TYO): Eastern Nagaland Women's Organisation (ENWO)-i ayongzüka 5buba inti senden menogo. Iba senden ya "Women Beyond Barriers" omen nung ajemdaker August 17 aser 18 nü Longkhim Town nung agia liasü.

Senden nung Member of Parliament aser Rajya Sabha Vice Chairperson, S. Phangnong Konyak alakteta jaoker liasü.

Sentong nung o jembiba mapang S. Phangnong Konyak-i, Eastern Nagaland nung aliba tetsürtem dang longjemer alitsü aser tai tokteptsü ayongzüka

liasü. Laisa, yimjunggi ajak dang tongtibangba ta shia Eastern Nagaland nung yimjung yanglur kaka shilem taliba agitsü tetsürtem ajungshia liasü.

Kasa mapang nung S. Phangnong Konyak-i, ENWO Units tem indang mapa sayaba exhibition ka lapoktsü aser ENWO magazine sayaja liasü. Iba sentong nung Deputy Commissioner, Tuensang Lithrongla Tongpi Rutsa (NCS), ENPO tir R. Tsapikiu Sangtam, Special Transport Officer Alem Bashang, aser 7 Sector Assam Rifle Brigadier, Tsg, Vikram Singh nungeria o jembiba liasü.

Maneni sentong nung AST tir Apila Sangtam-i salem osang lemsatep aser ENWO tir A. Shamthai Phom-i lokti pela agizükba o jembiba liasü. Sentong ya LTBC Pastor Dr. Longri-i sarasademer tenzük aser YWO tir Resangla Susana-i sarasademer tembanga liasü.

Conference nung Changsao Thangjam Setshang-i folk fusion saya, Khiamniungan Menyiu Hoikam-i ken tajung ka aten aser Tikhir Women Association-i sobaliba ken ka tena liasü. Iba sentong ya ENWO Joint Secretary lenisüba nung agia liasü.

NSCN/GPRN-i 'Hunapongpi' benjung salem lemsatep Dimapur, Luroi/August 17 (TYO): NSCN/GPRN-i sangdong ka ajanga Sangtam nungertem den 'Hunapongpi' benjung salem lemsatepogo, koba ajanga Sangtamer tem indang takar sobaliba sayur. NSCN-i, Sangtam nung

ajak yimji yimjung nung liyonga aotsü aser iba den anema lia naga nung yongtsü nung maneni telongjem atokdaksütsü inlaja ataba NSCN/GPRN (Akato Chopi) MIP sangdong ka ajanga metetdaksü.

Directorate of Technical Education-i metetdaksür

Dimapur, Luroi/August 17 (TYO): Directorate of Technical Education-i sangdong ka ajanga, NEET (UG) - 2023 Merit dak ajemdaker academic session 2023-2024 atema MBBS, BDS, BHMS, BAMS & BASL courses tem asoshi Nagaland State reserved seats süngdaksütsü atema candidate tem shimtsü asoshi State

Common Selection Board Committee, Spot Round Counseling August 18 nü 11:00 ako nungi tenzüka Directorate of Technical Education, Nagaland, Kohima Conference Hall nung agitsü ta metetdaksüogo. Züngsem ajak dang iba senden nung tamakok maludaksütsü aru shilem agitsü tem shimesha metetdaksüogo.

Kohima DPDB-i LADP 2023-2024 agizük



Dimapur, Luroi/August 17 (TYO): Ita shia amenba District Planning and Development Board (DPDB) senden August 16 nü DPDB Conference Hall, Kohima nung menogo. Iba senden ya Advisor for Prison, Printing & Stationery aser Kohima DPDB mendenbuba . Kropol Vitsu lenisüba nung agia liasü.

nüngdakba mapang ajak nung verification committee-i MLA temden teka amteper inyaksüla ta ashi.

Senden nung onük ajak rongnung Local Area Development Programme (LADP) 2023-24 agizüktsü asoshi tongtibangsa jembiba liasü. Board-i iba ya agizüktsü asoshi temelaba agütsüogo.

Senden nungsa board-i lokti tentet balala züngoksemtsü atema sensak asem aser item lokti tentettem; Nagaland Police Family Welfare (Old Minister's Hill, Kohima), Dzüleke Eco-Tourism Board (Dzüleke Village, Kohima), Nagaland Handball Association (KhikhaRüleizou, Kohima), aser Alumni Association, St Joseph's College (Jakhama) dak sendakba nung taruba jenjang agitsü atema sorkari dangi abentsü telemetba agia liasü.

Er. Kropol-i iba sentong ya koda tongtibang indang lemsatep, koba Planning Department-i agütsür aliba guidelines den jangyu medema scheme aser terenlok maparen balala asoshi lir, ta pai ashi.

Nagaland Dental Welfare Association (Peraciezie, High School Junction Kohima) dak sendakba nung board-i ken o tejangjaba metettsü atema lepareprangshitsü telemetba agia liasü.

Paisa, züngsem ajak dang pei tata tesemtem nung lenla ajak nung terenlok asoshi inyakym balala nung yakyaka inyaksü ajungshia liasü.

Maneni senden nung Kohima Municipal Council (KMC) Administrator, Lanusenla L. Peseyie-i Council inyakym indang metetdaksü. Taruba DPDB senden nung Veterinary Department-i parnok inyakym indang metetdaksütsü tetuyuba agütsü.

MLA Kevipodi Sophie-ia, iba sentong takok ngua benoka inyaksangshitsü atema LADP fund ya kanga kümdanga amshitsü ayongzüka liasü. Laisa,

Kohima nung 'Meri Maati Mera Desh' campaign ayongzüka agi



Meri Maati Mera Desh Campaign kübok sentong ka ayongzüka agiba mapang DC Kohima Shanavas C IAS-i süngtong ka atemba noksa nung angur.

Dimapur, Luroi/August 17 (TYO): Linük ajunga nung 'Meri Maati Mera Desh' campaign ayongzüka agiba nung shilem ka ama Kohima Municipal Area kübok tesem balala nung August 17 nü sentong balala ayongzüka agiogo.

Iba sentong ya linük asoshi taküm bendanga agütsüba sepaitem nem tetushi agütsütsü nükjidong nung aser 'Azadi Ka Amrit Mahotsav' tembangba sentong ka ama ayongzüka agiogo.

DC indang official ki anasa Raj Bhavan Area nung agiba sentong nung Deputy Commissioner Kohima, Shanavas C IAS-i o jembiba liasü. Pai, iba campaign ya India nüjiso atema raraba

mapang pei taküm bendanga agütsürtem nem tetushi agütsütsü asoshi maongka ka lir ta ashi.

Paisa, nüjiso atema raraba mapang mezüngdangtet nüburtem aikati pei taküm bendanga agütsüba lephsia liasü. Shanavas C IAS-i ashiba agi, linük nung sobaliba aser tamangba yimsü balala aliba ya India tashi lir ta ashiba den tebandang aliba ya tetsükdaksü ka masü saka lokti aser linük terenlok asoshi asütsüla, ta ashi.

Sentong nung Deputy Commissioner-i linük wako salatsü aser shilem agirtemi linük naklo ken tena liasü.

Maneni sentong nung SP Kohima, Imnalensa IPS-i

achaayanga Panch Pran Pledge agia liasü. Officer's Hill Panchayat mendenbuba-i linük asoshi taküm bendanga agütsürtem nem tetushi agüja Shilaphalakam (memorial plaque) bendanga agüja liasü. Iba sentong ya T. Lanusenla L. Peseyie, Administrator, KMC lenisüba nung agia liasü.

August 17 nüsa kasa mapang nung Rüzühkhrie Government Higher Secondary School aser Directorate of Art & Culture nung sentong ayongzüka agia liasü. Sentong ana nung ya Dr. Riku Khutso, EAC Kohima, aser Moasunep K. Jingru, EAC Kohima nati linük wako salaja liasü. Sentong nung School tanurtem aser local lenirtemi shilem agia liasü.

Dimapur nung mejangjaba tasü mang ka nguteta lir

Dimapur, Luroi/August 17 (TYO): August 16 nü Old Over Bridge Colony, Dimapur GB-i telephone ajanga Railway Auto parking anasa dokan ka kima mejangjaba tasü mang ka mepidaka aliba osang agüja liasü.

semmer liasü. Iba tesem anasa aliba dokan kiburtem dang ken o ashishiba mapang parnoki ashiba agi, August 15 nikongtsütsü pa ya leter liasü aser parnok dang chiyongtsü meshia liasü.

Osang dak ajemdaker East PS duty party iba tesemi ao aser mejangjaba (non-local tebur ka) tasü mang ka nguteta liasü. Asüsang ya arishi küm 30 nungi 35 tsüngda asütsü. Tasü mang nung yiruba zübuo kecha keta maliasü.

Temzüng ozüng kübok jenjang ajak agiba sülen tasü mang ya post-mortem examination atema District Hospital morgue-i benerogo.

Asüsang yagi naro aketba tola tanak ka, ali sentsüh vest ka, anüng sentsüh half pants ka aser tanen sentsüh slipper

Ken o dak sendakba nung asü sanger kinunger aser medemertem dang Officer-in-Charge, East Police Station, Dimapur. (Mobile No. 7085055020) den tongteprateptsü asoshi mepeshia metetdaksüogo.



August 17, 2023 nü Gandhinagar nung WHO Traditional Medicine Global Summit nung Union Health Minister Mansukh Madaviya, Union Minister for Ports, Shipping and Waterways Sarbananda Sonowal, Gujarat Chief Minister Bhupendra Patel aser WHO Director-General Tedros Adhanom Ghebreyesus nung adenba noksa nung angur.

MP assembly elections atema BJP-i candidate 39 sangdong

New Delhi, August 17 (Agencies): Taküm küm tatabanglen Madhya Pradesh nung assembly elections agitsü lia Brihostibarnü Bharatiya Janata Party (BJP)-i iba election atema mezüngbuba shilem nung party candidates 39 tenüng sangdongogo. Bodhbarnü BJP Tir, JP Nadda leniba nung amenba Central Election Committee (CEC) senden nung tenüng 39 ji agizüka liasü. Kasa senden nungji Ato kilonser Narendra Modi den Union ministers-Rajnath Singh aser Amit Shah nung aden. Taküm state pongu nung assembly election agitsü lia

BJP-i Madhya Pradesh aser Chhattisgarh assembly elections atema tama candidates tenüng sangdonger. Ano külen BJP-i Chhattisgarh assembly elections atema candidate 21 tenüng sangdongogo. Sarla Vijendra Rawat-i Sabalgarh menden nungi tokteptsü, Priyanka Meena-i Chachaoura menden nungi, Lalita Yadav-i Chhatarpur nungi, Anchal Sonkar-i Jabalpur Purba (SC) nungi, Nirmala Bhuriya-i Petlawad nungi, Bhanu Bhuriya-i Jhabua (ST) nungi, Alok Sharma-i Bhopal Uttar nungi aser Dhruv Narayan Singh-i Bhopal Madhya menden nungi tokteptsü.

2018 küm assembly elections nung BJP-i Chhattisgarh aser Madhya Pradesh naprongla nung tamakok ngua liasü, ajisüaka 2020 küm March ita nung Congress MLA-i party nungi anenba ajanga Kamal Nath-i aniba sorkar chirepba sülen BJP-i sorkar küma liasü. 2018 küm Madhya Pradesh assembly election agi aser party kati danga majority mangu ajisüaka assembly nung single largest party ji Indian National Congress (INC) liasü. BSP MLA ka, SP MLA ka aser Independent MLA pezüü yariba ajanga Kamal Nath leniba nung Congress-i sorkar küma liasü.

Opposition teloktep ajanga PM Modi shisabulur: Nitish Kumar

New Delhi/Patna, Luroi/August 17 (Agencies): Brihostibarnü Bihar Chief Minister, Nitish Kumar-i, opposition party temi INDIA teloktep tentetba ajanga Ato kilonser Narendra Modi shisabulur, kechiyong sangküm Lok Sabha election nung opposition teloktepi junga inyaktetsü, ta ashi. JD(U) lenir, Nitish Kumar-i Delhi semdangba aliba mapang pai taoba mapang Ato kilonser, Atal Bihari Vajpayee asüba anogomong (August 16) nung asür nem akhüm agütsüba sülen Brihostibarnü state yimtiba, Patna tonga arur osangbenertem den jembidang

pai, "Ni medical checkup atema Delhi-i ao. Iba mapang nungji lenir (Vajpayee) asüba anogomong liasü; pai ni kanga sakloka liasü," ta ashi. Yaküm Kumar-i BJP den teloktep raksa-a liasü saka Vajpayee Ato kilonser inyakba mapang nung pa Union Minister inyakba mapangtem pai bilemteta jembi. "Pa (Vajpayee) kenü anogobo Ato kilonser akümtsü, ta ni takzüteta liasü, yamaji atangji atalok. 1999 küm pa lenisüba nung sorkar teloktep dang National Democratic Alliance (NDA) aja," ta Bihar Chief Minister-isa metetdaksü. Ato kilonser Modi tenüng

metetshii Kumar-i, "Ni teloktep nung densema aliba mapang nung item nisungtem yagi NDA senden kodanga mayongzük. Onoki INDIA teloktep tentetba sülen senden anaben menogo. Tangbo parnok shisabulur aser NDA senden ayong tenzükogo," ta ashi. Bihar CM-isa, Narendra Modi lenisüba kübok BJP-i teloktep nung densema aliba party tem akhüm-metsübur, ta aitsü. Ita ana tejaklen Kumar-i mezüng Patna nung opposition party tem senden ayongzüka liasü; iba sülen tanabuba sendenji Bengaluru nung ayongzüka amen.



Kolkata, August 17, 2023: Brihostibarnü Raj Bhavan, Kolkata nung linük Tir Droupadi Murmu, West Bengal Angh CV Ananda Bose aser West Bengal Minister for Women, Child Development & Social Welfare Shashi Panja nung sentong ka adendang tangokba noksa nung angur.

Kerala sorkari sensak tia samatsütsü atema mapatong tenzük

Thiruvananthapuram, August 17 (Agencies): Kerala sorkari 2025 küm tashi nungbo state nung kanga sensak tia samatsütsü nükjidong nung mapatong tenzükogo. Iba nükjidong ataloktsü atema state sorkari telemtetba aika agia inyakdar, aser item rongnung sensakertem bus nung angati senzüdaksüba aser kanga sensaker kibongtem nungi kaketshirtem nem senotsü teyari agütsüba densema lir. Chief Minister Pinarayi Vijayan mendenbuba ser amenba senden ka nung state nung sensak tia samatsütsü atema telemtetba agia liasü. 2025 küm November 1 tashi nungbo state nung kanga sensak tia malitsü nükjidong yur state sorkari asalentong yanglua mapatong tenzük. 2023 aser 2024 küm nung state sorkari shilem ka-ana lemsar sangdong agütsütsü aser kanga sensak tia nung alir kibongtem tajemba akümba osangtem lemsateptsü. Class 10 pass asürtem maneni azüngtsü atema facility agütsütsü aser kanga sensaker kibongtem nungi kaketshirtem nem higher education scholarships aser stipends agütsüba den külemi college

canteens nung chiyungtsü angati agütsütsü. Chief Minister-i ketdangsertem dang ali makartem aser ki malirtem nem kimong aser ki agütsütsü atema mera agia inyakang, ta tuyuogo. Iba dak alia special medical board ka tenteta board jagi shimang nung matamabensartem nem identity cards agütsütsü. Chief Minister-isa kanga sensak tia nung aliba kibongtem dang pei sasa taküm litettsü atema lenmang karbosa bushitsü merangtsüla, ta metetdaksüogo. Chief Minister-i Medical Colleges aser District Hospitals nung Psychiatrist tem dang kanga sensaker kibongtem nungi tekolok meshidakertem nem angati medical care agüjang, ta tuyu. "MIS Portal nung kanga sensak tia nung aliba kibongtem indang osang metetpelatsü atema Departments nem facility agütsüogo. Kibok tonga oa parnok nem nungdakba osettsüset aser services agütsütsü. Iba maparen nung organisation balala nungi züngsemtemi yariteptsü," ta Chief minister, Pinarayi Vijayan-isa metetdaksü.



August 16-17, 2023 ayaterm nung Mumbai tzüymkümlen Arabian Sea nung Indian Coast Guard sepaitemi MV Dong Fang Kan Tan No 2 rong nung temelungjang tashidak agi shiranger China nung ka kümzüka anir arudang tangokba noksa nung angur. Research agir China nungbaji Yin Weigyang lir ta jangjaogo.

Delhi Assembly nungi BJP MLA 4 meindok

New Delhi, Luroi/August 17 (Agencies): Brihostibarnü Delhi Assembly nung Manipur tensa atema o lemtepa anema BJP MLA temi longkak aitba sülen security sepaitem nem BJP MLA 4 senden nungi meindokdaksü. Onük balala nung o lemteptsü atema senden ayongzüka liasü, ajisüaka AAP MLA, Durgesh Pathak leniba nung Manipur tensa atema mapang tatsüka o lemtepa mapang nung BJP MLA temi ibaji anema nokdakba ajanga rongrong adoka liasü. Senden nungjisa Pathak leniba nung AAP MLA temi Ato kilonser, Narendra Modi anema yimyim ayimba ajanga ano rongrong tesashiba adoka liasü. BJP MLA tem jagi,

assembly nung Delhi dak sendakba onüktem ang jembitsüla, ta takhangba agütsü. Iba mapang nungji Deputy Speaker Rakhi Birla-i, "Iba assembly nung Manipur tebilemtsü onük jembitsüji metemsü, ta nenoki bilemer asü? Uttar Pradesh Assembly nunga Manipur tensa atema jembitsü asoshi mapang lemsüktsü," ta ashi. Ajisüaka BJP MLA temi maneni longkak aitba ajanga tesüsabo BJP MLA pezüprong- Abhay Verma, Jitender Mahajan, Ajay Mahawar aser OP Sharma nung senden nungi meindok. Tesülen Pathak-i Manipur tensa atema o lemtepa nung BJP-i shilem agitsü memelungba atema sasa bilemer, ta ashi.



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 18, 2023

Yimti tasen ka

Taküm 2023 küm India yimten nüchiso anguba anogo nung Nagaland chief minister-i sangdongba osangtem rongnung tajungtibaji Nagaland atema Chümoukedima district kübok Chathe lenden nung yimti tasen tajung ka akümtsü asoshi ali square kilometer 39 shi wazüka yua lir ta metetdaksüba osangji asütsü. Atangji, tang Nagaland renlokba jenjang ya reprangdangra yimti dang masü, ano Nagaland-a tasen ka yanglunütsüka tezüdangtsü jenjang nung lir. Asenok tar nung Lijabai asen lima aritepa yangluba agi lenden masü saka tenem tekong aser koktetkokshi agi sünga mashimashi yanglu ta jembia aru ama, Nagaland state-a aritepa yangluba agi tanü tashi junga meyangertet kangshir. Aji oda, Nagaland nung akaba town ajak nung tular aser takartemi anir pei alitsü ki den bara ki asütsü atema government ki aser kimung ajak agiadokogo aser yimkong lenmang dena atsüngsepa agiadoker gari ana süteptsüa makok aser tanendaka maka ta anogo shia timtem ajuruba yimtitemji Nagaland nung aliba yimtitem lir. Ano, iba denji asenoki atsünga agi anüngba yimti yimdong tilakajia junga anepalu mesütet auyi aser lishitsüng menemba agi teni nembanger senzüba yimtiji Nagaland nung yimti tuluba Dimapur-i anir asenok aliba yimtitem asütsü. Tangarbo yimti yimdong tila süaka Shillong aser Aizawl ama yimti yimdong nung auyi madoker aser lishia madoker. Parnok lenmangjibo temeli agi menak ama merükmerüker. Item yimtitem nungjibo tetsüng agi anogo piyong jajayonga tsüngsem memenener. Iba denji kodang asen yimtitem medemdangdir, asenokbo tsüngsem aser süoshi tajung semerbo yimti nung tetsüng agi senzüsülabo masüka asenoki asen yimtitem yangerteta lir. Atangji, lenmang nung auyi apungyonga aser lishi adokyonga gari tajung nung tatsük temekong memetet window glass shibanger jajartem asoshiibo kecha balaka timtem mali, tangar ali nung teni nembanger jajartemjiang temenünütsüka repranga alitsü. Ajisüaka, tangari asen lima aser asen yimtitem asadangtsüba yimti nung gari tajung senzüba aser ki tajung talang kar yanglua akaba jagi masü saka yimti yimdong merükba, sademba aser awashi metetbatem agi asadangtsü. Asenok yimti nungbo ki ki dang sütepba agi kaketrejitem nunga tanurtem asayadak moapua maka kümogo aser anepdang aser nikongdang mopong tajung chia kazüdak moapu 'Public aser Children's park' amala nungdakba tesemtem tenük agi mangu kümogo. Asenoki tangar tashitemeteterem aliba yimtitem reprangdangra, kiyong shia kibong ishika süli kazüdak moapu (park) ka, ano kibong ishika süli kazüdak moapu aser asayadak ka ta pei yimti aser pei kiyong shiaji telinütsüka teronem menema yanglur. Ibaji dang masü saka light yindong shiaji light bulb alenloktsü atema dang masü saka yindong agi naru kuma yanglur yimti topur jungdaksür. Aji oda, yimti yimdong agi naru tsüki kuma yanglur nübortem anisüngzüka jajatsüsa gari lenmanga aser tetsüng lenmanga kilong nung jajar amai jajatsüsa yanglutsür. Itemji government-i inyaker aser nübortemia pei yimti topur ajungtsü aser sademtsü asoshiibo mulungsua yariteper. Atangji, yimti kaji nisung mali ser meyanglutettsü, anungji yimti tasen ka yanglutsüba tamasa nisungtem mapa inyaka alitsüsa mapa akatsüla. Aji oda, yimti tasen ka akümtsü atema iba tesem nungji tamasa mozü ki tajung ka lapoktsüla mesüra kaketreju tajung ka amenoktsüla mesüra industry kar tenzüka inyaktüla. Item sülenji dang nübortem oa ali tenzüksü. Akhidangbo, yimti ka akümtsü atema tamasa government office ka lapoka district aser sub division aküm. Ajisüaka, tanübo town akümba agi nübortem oa alir masü saka nübortem aliba agi town akümer. Atangji, Nagaland nung yimtitem tajungba renloka aotsü atema Town Planning agi Urban Development, town committee agi Municipal aser Town council ta melen saka tenüng melenba dang ashi asenok tangatetba aser asen limabo memelenshii lir. Joko, Chathe City nungji danga lanu asensortem sentepa yimti dang masü tangatetba tasen nung meimchir mesüka alitsü imlar.

OLEMSABANG

NAI KECHI PROKDIR AJI NAISA ARUTSÜ

- R. Nungshi Longkumer

Aluyimertemi arem jidoker, ano mi agi merüka-merüka rongtoker, tsük metsü (seeds) tajung bushia ali nungji yoker (proker) yamaji alu kibur jagi alu nungji mesürong tsük (maibu) prokra mesürong mu meitsü aser mapang tatong nung mesürong tsükjong atoka ibaji rua bendentsü, alu kiburi alu nungji tsükchi tsük prokra tsükchi mu meia tsükchi tsükjang tajung adoka aji rua bendentsü. Aluyimertemi par alu nungji mesürong tsük prok sür nung tsükchi mu meia tsükchi tsükjang bendena ruogo ta asüba otsü angashia maru ano mangashitsü südi. Ano meimchirtem rongnung karibo tsük lu masü, saka sen lu-ang yim lidi ta sür sen dang bushia ibajagi pei takum aser kibong liyonga aotsü meranger. Ajia pei mulung, na ibajibo tenyak ta shingaia mashitsü, nisung shia pei tepok nung tebin tilaka alibaji chiyongtsü agi sungdakja takümüji liyonga aotsu asoshi inyakteper saka ya metetti nai aser ni kechi mapa inyakdir inyakaka ochi agi inyaktüsü kangasa tongtipang.

Saka tsük lu ayimer o sen lu ayimer tsüngda tuluka lir, shidi süra tsük lu ayimertemi pa mapa nung aibelentsü aikabo madoker, kechiyong parnoki anepdang yakta saaker surojioka chiyonger alui aotsü anogo tepiyong alu inyaker adoka surojioka chiyonger anisüngzüka mejangtsü. Saka sen lu ayimertembo sen bushirtembo meteta aser memeteti aibelentsü aika dang lir. Aseni asensasa mekümdangra kecha masüar ta ser kenü tera meshidak inyaktüsü ano asüng meshidak tera teimba inyaktüsü aser oda odabo kecha masüar ta ser meshidak rongsenji ki sunga bendentsü. Oda sen lu yima alitsüji lenmang aika dang lir, kar sorkar mapa asüyonga mesüra nija (private sectors) mapa nung asuyonga ita sen bendena ibaji chia taküm alir. Ano kari shishilembaba (business) inyaka taküm alitsü jangrar, ano karibo hajira dang oa inyaka liner, kechi mapa nung südir süaka nisung shiai nendaknendaka meranga inyaker chiyonga alibaji koda jangratemsüka lir.

Adangji ita sen achir aikati pension madong tashi meranga inyaka sen rizunga yur kodang pension mapang tongdir sen aika agizüker kimong tajung alia ki tajung ser jangratema aliba angudang kanga dang pelaseta repranger, shishilembar temia angoshia terara bendena ibajagi anisüngzüka lia aoba angudang pelaa bilemer aser pelaa repranger. Kechiyong nai ochi shia bendenba sen agi ki tajung yanglu nung na jangratema alitsü aser na aliba tesemji tebur jungdaksür, gari lenmang tajung nung jangratema pelaseta senzüdang tular tenüng sanga senzuba ama, mesüra current (electricity) ken danga masepi tsükloker lira idangjibo tular tenüng sanga jembir.


Yamaji ki tajung nung lia, lenmang tajung nung jajaa asen aginunba ajak ngua aser nguteta litetba lima dangji alima tejakleni renloka aoba lima ta ajar.

Saka gari lenmangji kelen ang tamajungba ano kulen ang tamajungba, current (light) kodanga regular sua melidanger iba dangji alima tesüleni aoba lima ta ajar aser ochi shia inyakba mesüra ochi mashi inyakba ajakji iba nungjisa sendaka lir. aseni bendenba ringsenji ishika dangf asütsüa akok ano oda aika asütsüa akok saka item rongsentemji koma jembia, koma inyaka benden? Alima nuburtemi ibaji asüngdang!!!nuburtemi asüngdangbajibo aseni langzutettsüa akok saka teyanglur Tsüngrem ajak metetsang Tsüngrem ka lir, Pa tsüngdangbo shingaia memeimshitettsü, Pa tsüngdangbo ajak sadakjema dang ngua lir. anungji kari danga meshidak inyaka rongsen bendenyaa lira melenshidi arungma, mashilen nungi anguba rongsen agi chirnunr memesüli, rongsen mashimashi bendener chirnur aser kibong mesüba asen chirnur aser kibongji aiatai tiai yoker asütsü.

Oda aseni tajung inyakra asen dani tajung temoatsütem ang arutsü aser tamajung inyakra asen dangi, asen kibong dangi tamajung arutsü. Anungjimetsü tamajung masü metsü tajung dang prokdi ta tayongzüka olen kar lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor Tim Keller nem tatembangbuba akhüm agütsüba sentong agi



Tim Keller

August 15, 2023 nü New York City nung St. Patrick Tenla kidang pastor, Tim Keller bilemteta asür nem tatembangbuba akhüm agütsüba sentong nung tangokba noksa nung angur.

August 17, 2023: New York City nung evangelical pastor, sayutsünger, Laishir aser kaketzülur, asür Timothy Keller nem tatembangbuba akhüm agütsüba sentong ka Mongolbarnü (August 15) agiogo.

Tim Keller mapang talangka pancreatic cancer agi shiranga aruba sülen May 19 anepdang asü; pa arrshi küm 72 liasü.

Alima tesem balala nungi nisung meyrjang 2 shi New York nung aliba St. Patrick Tenla kidang adenshia asür nem akhüm agütsü. Iba sentong tagidak mapang nung adenertem-a 10,000 shi liasü.

Asür bilemteta akhüm agütsüba sentong nungji jembidang pa kinüngtsü, Kathy Keller-i, "Tim Yisu den lir-taneptsü nguogo, temeim

nguogo, taküm lir aser tang tepelatiba lir," ta ashi.

Par jabaso, Jonathan Keller-i tebu ya ajak ajungmesor ka liasü, anungji ajaki pai sayuba tatishitsü tajungji beshidi, ta ayongzük.

Kasa sentong nungji Lai tekong balala azüng aser Keller-i shimba osangtajung kentem aten.

Pastor Keller'er kibong tembar, Sam Allberry-i, asenoki Tim dak keta aliba yimya tajung ajakji Khrista dak jangjajangja angur, anungji Tim angatettsü atema tajungtibaji Khrista indang shisadangtsüla, ta ashi.

Kasa sentong nungsa Redeemer campus pezü nungi pastor temi Yohan 14, 1 Korint 15, 2 Korint 4, Rome 8 aser Mark 10 taputem zünga liasü.

Iba sentong nung adenertem rongnung actress

Patricia Heaton, New York Times ocet zülur David Brooks, puti otsü mongin Molly Worthen aser rap kentener Lecrae nung densema liasü.

Manhattan nung aliba Redeemer Presbyterian Arogo ya Tim Keller aser pa kinüngtsü nati tentetba Arogo lir.

Tim Keller-i Gordon-Conwell Theological Seminary nung master in divinity renem aser Westminster Theological Seminary nung doctor in ministry ngua liasü.

Pa Hopewell, Virginia nung aliba West Hopewell Presbyterian Arogo nunga pastor inyak, Westminster nung associate professor inyak aser America nung Mercy Ministries for Presbyterian Church nunga Director inyaka liasü.

Indonesia nung Khristantem tekülem tagidak mapang timtem agütsü

Surabaya (Indonesia), August 17 (Agencies): Tan ita Indonesia nung telok kati Khristantem tekülem sentong tagidak mapang nung timtem agütsü aser tang tesüdak Tenla ki ka raksatsüogo.

August 09, 2023 nü Riau Islands Province nung Nongsa District kübok Kabil yimdak Muslim nunger 30 dak temai tang tesüdak Tenla ki ka tepsatsü; iba kimongji Pentecostal Mission Church in Indonesia (Gereja Utusan Pantekosta di Indonesia) meyong lir.

Social media nung video ka prokshioigo aser video nungji lokti nungjagi tebu kati, Tenla ki yanglutsü atema Arogo ket nung temelaba mali, ta ashir.

Pentecostal Mission Church in Indonesia nung Pastor, Sham Jack Sean Napitupulu-i, iba tesem nungji Tenla ki asütsü atema Arogoi Batam Free Zone Authority ket nungi temelaba shidi ngur liasü, ta metetdaksü.

Police aser Batam Interreligious Communication Forum (Forum Kerukunan

Umat Beragama) Chairman, Chabullah Wibisono-ibo, iba tatalokba ya tamangba yimsü dak sendakba masü saka kiyong nung alirtemi iba kimongji public facility atema aginüa liasü, ta ashi.

Arogo lenirtemi Tenla ki raksatsüba anema Riau Islands Police nem ken o agütsüogo.

Association of Indonesian Evangelical Churches and Institutions (Persatuan Gereja dan Lembaga-Lembaga Injili Indonesia) Chairman aser Pastor Jimmy Loho-i iba tatalokba ya aitsütsü tetemsü, ta metetdaksü.

August 11 nü administrator-i police headquarters nung Batam City Muslim lenirtem aser Indonesian Ministry of Religion nungi Proverbs Yowei nung den senden ka mena 'permit' magütsü tashi Tenla ki tesüdak mapaji anena alitsü metetdaksüogo.

Iba dak alia Tenla ki raksatsürtem anema bushisügang tangzükogo.

Ano külen tanga osang ka nung, August 6 nü North

Sumatra Province kübok Tanjung Morawa yimdak nunga Muslim nungertemi Mawar Sharon Arogo nung Amongnü tekülem sentong agitsü atema godown ka amshiba anema longkak aitba den külemi Khristantem dang godown anasa Tenla ki asütsü tebilemba alibaji agienang, ta metetdaksü.

Godown kiburji Arogo züngsem ka lir, ibayongji Amongnü tekülem sentong agitsü atema pai godown amshitsüji melaa liasü, ta Arogo secretary, Emmy Marlina-i metetdaksü.

Laisa, "Khenpiga atema tekülem sentong agitsü atemabo 'permit' menügdaker," ta ashi.

Tang alima nung Khristantem alitsü tamajungtiba linük 50 rongnung Indonesia ya jenjang 33 buba nung lir (Open Doors' 2023 World Watch List).

Indonesia nung nütsüng teimbaka Muslim nungertem lir aser mapang shia Islamic kiralongrartemi Arogotem aser missionary tem anema inyaker.

ANOGO ABEN TSÜNGREM DEN

Takok Rongsen

T.Ken 119: 161 - 168

"Temakzükba oset angur nisung amato; ni ne O nung pelaseta alir" (t. 162). Rongsen tuluji asenok kodang angu? Yimya agi tongpang rara ka sülen rongsen tuluji angur. Iba tekong nung asen taküm nung tongpang rara ka tenzükba indang sayur.

Shi nisung mesüra yimya koloki Laishibaji tazüokba nung azüngtsü aser bushitsü mejangrar. Alimai aji maginer. Alimai Laishibaji sentoker, tiyazü aser amajok tebilemba nung amangdaksüner. Satani Laishibaji sempar. Asenok koda sür Laishiba nungi piladaksütsü pai pa tajungtiba inyaker.

Aji asü nung Laishibaji tejak o tejak na chitepa raradak ka akümer. Asenoki Laishibaji jangraa mezüdaksütsü asoshi Satani jangratemtsü kaket aser magazine tamajung aika adokdaksür aser agütsür. Laishiba melen item kaket tamajungtem azüngba ajanga Satani asenok taküm nung takok ngudaksür.

Atangji Laishibaji takok rongsen lir. Iba nung takok angutsü asoshi ken ken rarateper. Saka ano idakji tepela lir. "Temakzükba oset angur nisung amato, ni ne o nung pelaa alir" (t. 162). Laishiba azüngba, bushiba aser ibaji rizünga ayubaji lenmang tajung ka lir. Taküm lenmang nung aibelen masütsü asoshi Laishiba nung kechi jungkai adoka sayur aji ne mulung nung rizünga ayutsüla. Laishiba bushiba jagi asenok taküm takar kümdaksür. Lai bushiba jagi o ji dang angatetdaksür masü saka na Tezülurji tali mesüka kümdaksür.

Tamangertem shirnoki Laishibaji azünger aser bushir parnok anema Satani tongpang rara jazüker. Kechiaser nai kodang Laishibaji azünger aser bushir na Yisu mesük tali akümer. Nai tongpangji kokra, temakzükba oset nungji na pelaa alitsü. Tsüngrem O bushiba jagi na takar kümdakjang. Rongsenji agiang aser Laishiba bushiba tepelaji ne meyong kümang.

Pakistan nung Tenla kitem raksatsür Muslim nunger 129 puogo

August 17, 2023: Bodhbarnü (August 16) Pakistan nung Muslim nungertemi Tenla ki trok den Khristantem ki amakba sülen ghonda 24 tsüngda police-i Muslim nunger 100 dak tema puogo, ta Brihostibarnü ketdangsertemi metetdaksü.

Brihostibarnü Regional Police tongti, Rizwan Khan-i, iba tatalokba dak sendakba nung melung melemi police-i nisung 129 pua lir aser tensa azioktetogo, ta metetdaksü.

Pakistan nung Khristan anati Muslim nunger temeshi kaket Koran nungi tapak kar shisaja mezüngmeshiba otem zülua toktsü, ta tai tongloktsüba sülen Muslim nungertemi longkak aita Tenla ki aika raksaja liasü.

Faisalabad district nung aliba mosque ka nungi

sangdong ka agütsüba sülen Muslim nunger lokti jagi Basti Maharawala kiyong nung Presbyterian Tenla ki asem, Catholic Arogo Tenla ki ka, Full Gospel Assembly Church Tenla ki ka aser Salvation Army Tenla ki ka raksatsü.

Bodhbarnü Arogo nung putir kati, iba tesem nungji alir Khristantem teimbaka jena oadokogo, ta metetdakja liasü.

Tenla kitem raksatsüba sülen Muslim nunger lenirtem telok ka Jaranwala-i arua tensa süngjemdaksütsü meranga liasü.

Ano maneni raraba nokdangtsü atema ketdangsertemi hopta ka atema schools aser office ajak shibangtsü tuyuba den külemi lokti senden kecha

m a y o n g z ü k t s ü metetdaksüogo.

AO OSHI ANGAZÜKDAK: TANÜ ANGAZÜKTSÜBA OJANG



Roro

(adj) akhüm taket, telemsa (dignified)

* Arenbabo tanur asüdang nungi rororliasü.

Rungsep

(v) mi agi okshia arungba (burnt to ashes)

* Manipur nung ki aika rungsepa rungdokogo.

OLONG PAITEP # 6609

Grid for OLONG PAITEP # 6609 with numbers 1-15 in various positions.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latetsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6608 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Süjak, 10. Aonung, 11. Dokan, 13. Tinu.



TANTSÜR KA DOCTOR DEN:

Tantsür : Doctorba, tawa ka nungi kechi asüar ni scü pezük dang kecha olaa mangashir aser temenema memenemer aja, kechi tetamatsü ar na?

Doctor : Oh, na iba mozü ya anogo nung anana, anepdang ka, aonung ka ta chiang aser anogo pungu tashi mozüji chir anogo trok buba nung arung no?

Tantsür : Hai Sir. (Anogo trok buba nung)

Tantsür : Sir, scü pezük dang tangbo menemera saka mangashira.

Doctor : Shitaka, na sinusitis agi teni tangopanga aliba lapokdar, ano tenarong agi angashitsü machine (hearing aid) ka inoktsüdi, iba sülenjiang scü pezükshia tangashia angashitsü aser temenema menemtsü ta ati, no?

Tantsür : Yamaji na?

~ Lilir : WhatsApp

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Naga & Kuki nunger-i Ukhrul nung relief camps mamenoktsü lemtet

Ukhrul, Luroi/August 17

(Agencies): State-i benokba ama mepetmesü adokba ajanga prokshir alirtem atema Ukhrul district nung semi-permanent relief camp tem mamenoktsü asoshi Tangkhul Naga Long (TNL) aser Kuki nunger lokti tentetem mulungtepogo.

Lokti tentet balala senden ka amenba sülen parnoki onük asem agizüka liasü. Parnoki mulungtepba mezüngbuba onükji, Ukhrul nung semi-permanent relief camp tem mamenoktsü aser iba melena district administration-i tanga tesem ka bushitsüla. Tanabuba

nung tanga district tem nungi IDPs (internally displaced persons) tem Ukhrul nung mejenokdaksütsü aser kar danga jenoka lir parnoki pei talidaki meyipa yoktsüla. Tasembuba nung relief camp tem nung jenoka alir IDP tem shirnok pei district-i meyipa moteter parnok nem TNL-i takokba tashi teyari agütsütsü.

TNL tatong tir RS Jollyson-i ashiba agi, iba bangzüng ajanga tarutsü nung mepetmesü adoktsü aliba nungi jenbotsü.

Paisa, United Naga Council (UNC)-i tetuyuba agütsüba ama teti atema kitem mesüra

semi-permanent relief camp tem Naga nunger aliba tesemtem nung amenoktsü memelatsü aser iba ken o dak sendakba nung Manipur sorkar nem tezüluba nung takhangba ka agütsüogo, ta ashi.

"Ken o dak sendakba nung UNC tetuyuba dak ajemdaker, tetsü tebou mapang nungi onok ali ya kija mesüra lokti (kin, yimtsüng) meyong lir. Iba sobaliba inyakyim ya temzüng ozüng kübok Vth Schedule den Article 371(c)-i teküzmzüka agüja lir aser onok ali bendangertemi atsüngtsü makok," ta kasa sangdong ajanga metetdaksü.

Mizoram: Meth tablets seret 2 bener Tripura nunger ana apu

Aizawl, Luroi/August 17

(Agencies): Mizoram police-i, Methamphetamine tablets seret 2.330 bener lia Tripura nunger ana puogo.

Temesepba mozü shibelener ana ya Brehostibar anepdang pua liasü, ta Mizoram police-i metetdaksü.

Aija alisang ana ya Sourabh Nath (34) aser Nur Ahmed (39) ta jangjaogo.

Mizoram police-i pua aliba nisung anaprongla ya North Tripura nungi lir.

Temesepba mozü ya Aizawl District Special Branch (DSB) team-i, Mizoram yimtiba Aizawl

teyongtsü nung Dawrpui new market nung pua liasü.

Aija alir ya Narcotics Drugs & Psychotropic Substances Act, 1985 kübok section tapet dak ajemdaker puogo, ta Mizoram police-isa shisem.

Kasa mapang nung Mizoram kübok Serchhip district nung Assam kübok Karimganj district nungi nisung ana heroin aser Methamphetamine bener lia puogo, ta police-i metetdaksü.

Osang tejangja angazükba sülen Serchhip district nung East Lungdar police patrolling party-i temulung meleme bilemba gari

ka Mongolbarnü sota bushisüngdanga liasü, ta kasa sangdong ajanga metetdaksü.

Gari nung soap cases 39 nung heroin gram 548.15 aser Methamphetamine seret 5.32 (tablets 50,000) shi bener aliba nguteta liasü.

Temesepba mozü shibelener ana ya MD Ekbal Hussain (21) aser Sayad Uddin (27) ta jangjaogo. Tenaprongla ya Assam kübok Karimganj district nungi lir.

Tena ya Narcotics Drugs & Psychotropic Substances Act, 1985 kübok section 21(c)/22(c)/29/25 nung aitsüogo.

Assam: Cachar BJP office nung tasü mang ka ngutet

Guwahati, Luroi/August 17

(Agencies): Brehostibar anepdang Assam kübok Cachar district indang Bharatiya Janata Party (BJP) office, VIP takdang nung tebur ka tasü mang ngutetogo.

Osang ajanga ashiba agi asüsang indang maitsü ya mejangja.

Party züngsemtemi iba ken o ya mimbangtsü merangdang, ajisüaka lenmang kar ajanga media nem iba osang agüja liasü.

Tasü mang nguteter asünung mapang tatsüka lir police nem osang agütsü aser bushisüngdang tenzüko.

Ken o maneni asdangtsü

aser asüsang maitsü jangjatsü atema tasü mang ya morgue-i benerogo.

Osang agütsüba mapang tashi nung district party lenirtemi ken o dak sendakba nung kecha telangzüba magütsü liasü.

Nisungba ya tepset asü mesüra kodaser asü iba indang tang tashi mejangjai lir.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND:KOHIMA NO.DHFW-21/FSSA/Workplan(MoU)/HR(FSW)/28/2022-23/2034 Dated:Kohima the17thAug'2023 NOTIFICATION In pursuance to this Office Advertisement No.DHFW-21/FSSA/Workplan(MoU)/HR(FSW)/28 /2022-23/2024 dated 3rd Aug'2023 and Addendum No.DHFW-21/FSSA/Workplan(MoU)/HR(FSW)/ 28/2022-23/2027 dated 8th Aug'2023, the Department on the basis of aggregate marks obtained in the Walk-in-Interview conducted on 10th Aug'2023 is pleased to recommend the following candidates in order of merit for appointment to the contractual post of Food Technician for a period of 3 months under Nagaland Food Safety Project for the Food Safety on Wheels under Kohima, Mokokchung and Dimapur which is co-terminus. Selected Candidates Table with 6 columns: Merit, Roll No., Name of the Candidate, Place of Posting. Note: *Acceptance letter should be submitted to the undersigned on or before 22nd Aug'2023, delay in submission of the acceptance letter shall not be entertained. Waiting List (Validity period for waiting list will be for 6 months from the date of result declaration) Table with 6 columns: Merit, Roll No., Name of the Candidate. Sd/- (DR.VIBEITUONO M. SACHU) Principal Director & Addl. Food Safety Commissioner Directorate of Health & Family Welfare

West Africa linük timba Niger-i aotsü renema lir: ECOWAS

Accra, Luroi/August 17 (Agencies): Economic Community of West African States (ECOWAS) ajanga ashiba agi, parnok züngsem linük timba 'standby force' nung shilem agitsü renema lir, aser taoba ita tatemlen Niger nung mitkar temi sorkari atsüngdoker alidak teka amuoktsü akok.

Züngsem 15 aliba regional bloc indang defence chiefs tem Accra nung Brestostibarnü ajurutepa liasü, koba July 26 nü mitkar temi Niger tir Mohamed Bazoum atsüngdoker aliba tanaben anioktsü asoshi merangba nung shilem ka alitsü.

Mitkar temi yimsü asüba linüktem aser Cape Verde dak alaka züngsem linük ajunga standby force nung shilem agitsü renema lir, ta ECOWAS commissioner Abdel-Fatau Musah-i Brestostibarnü ashi.

"Onok democracy atema nokdaker aser onoki ibaji ajungshir. Onok adenshiba ya

tatalokba balala asoshi meyipa inyaksangshitsü asoshi kisüng masü saka yimjung tesunep asoshi sentong yanglutsü atema lir," ta Nigeria indang Chief of Defence Staff, General Christopher Gwabin Musa-i ashi.

August 6 tashinung yimten yimsüsür anema nokdakba sepaitem dang Bazoum chioka tanaben tir menden nung mendaktsütsüla, aji mesüra mitkar temi teka amouoktsü ta sangdongba anogo süyiba sülen Niger timtem indang jembitsü asoshi iba senden ya amen. Bazoum ya tang tashi par linük yimtiba Niamey nung pa kinungtsü aser jabaso den house arrest nung lir.

Tetsüngtai ia yimjung asoshi jembitsü telok balala Niamey-i aoba aser iba telok tsüngta ajaki memolungba mechi ECOWAS ajanga mitkar tashi amshitsü mapang talangka jembia arur saka mapa kuma meinyaker.

2020 küm nungi aiben mitkar tashi amshia sorkar atsüngdokba Burkina Faso aser Mali linükibo Niger nung mitkar teka sangshira ajibo 'act of war' ta sangdongtsü ta shia lir, anungji region nung tzükumlen aliba linüktem aser Sahel nung aliba linüktem tsüngta telemsa adoka aliba temai adok.

Guinea ya mitkar yimsüsüba kübok lir aser bendangeri tashiyim amshiba aija arur, parnok tang tashi ola madoker.

African Union indang mitkar lenirtem Hombarnü ajurua mitkar temi teka sangshiba nung yaritsü asü masü ta jembia saka tang tashi parnokitelemeteba agia aliba yimjak nung mesangdong.

African Union indang Peace and Security Council yagi mitkar teka sangshitsü asoshi telemeteba agitsü akok, saka parnokitelemeteba amshitsü memolungra ECOWAS-i inyaksü akok.

Cape Verde anasa rong ka angu, nisung 60 tema sür alitsü imlar

Dakar, Luroi/August 17 (Agencies): Senegal nungi aruba rong ka Atlantic Ocean nung Cape Verde anasa tzüma nung pongdaka anguba sülen nisung 63 süogo ta amanger, ta ketdangsurtem aser International Organization for Migration (IOM) ajanga Bodhbarnü ashi.

July ita Senegal nungi apusoba ango apudang amshiba rong nungi tanur arishi küm 12 nungi 16 tsüngta par pezü densema nisung 38 kumzük, ta IOM odongtar Safa Msehli-i osangbener dang ashi.

Senegal indang foreign ministry ajanga Mongulbar aonung ashiba agi, kumzuka alir par 37 bo Senegal nung lir aser ka Guinea-Bissau nungi lir. Iba rong nung mena alirtem ya timba Senegal nungi südi ta amanger.

Iba rong nung kechi atalokar mejangja, kechiaser tang tashi osang peria mali.

Emergency services ajanga nisung tenet tasümgang ngutet aser nisung 56 samar alitsü südi ta amanger, ta IOM odongtar Safa Msehli-i ashi.

"Yimya agi rong raksaba sülen nisung samaba osang lira itemji asüba amai züngshir," ta lai ashi.

Spain nung angu apuba rong kati iba rong ya Sal asetkong nungi kilometre 320 shi pilar Hombarnü angu aser Cape Verde ketdangsur nem osang agütsü, ta police-i ashi.

"Asenok teka salar takum alirtem pela agizüktsüla aser asürtem akum agüja aremstüla," ta Cape Verdean Health Minister Filomena Goncalves-i ashi.

Spanish migration advocacy group Walking Borders ajanga ashiba agi, iba rong ya ango apudang amshiba rong tuluka liasü, koba dang pirogue ta ajar, aser iba rong nung refugee aser migrant tem 100 dak tema mener Senegal nungi July 10 nü apuso.

Iba rong nung mena alirtem nungi anogo ter tashi osang kecha mangashiba sülen Dakar north tsütsü kilometre 145 pilar aliba Fass Boye nungi kinunger temi Walking Borders den July 20 nü osang agütsü, ta iba telok tentetla Helena Maleno Garzon-i ashi.

Yangji aliba angopur telok nung tir Cheikh Awa Boye-i ashiba agi, par kinunger ana samaogo. "Parnok Spain-i onüa liasü," ta Boye-i ashi.

Iba rong nungi takum kumzük par tenet mozü kidangi anir aotsüsa akum, ta Sal nung health ketdangsur Jose Rui Moreira-i ashi.

Cape Verde ya asetiong linük ka lir, koba West African tzükum nungi kilometre 620 shi pilar Spanish Canary Islands leni aoba maritime migration route nung lir, koba European Union asoshi süngkum ka amai lir.

Refugee aser migrant meyrirjang aika makamait aser rara nungi jena pei takum bendanga agütsür lendong aliba lenmang nung jajar.

Parnok aiben rong tila nung jajar, koba nisung shibelener temi sen yong agütsür.

January ita Cape Verde nung rescue team temi refugee aser migrant 90 shi rong ka nungi kumzük aser nisung ana sür liasü.

Parnok ya Senegal, The Gambia, Guinea-Bissau aser Sierra Leone nungi liasü.



August 17, 2023 : Indonesia nung Independence Day benjongmung nung shilem ka ama Jakarta kübok Ancol Beach nung nüburtemi temo mezür aliba süngkumi atutsü merangba noksa nung angur. Dutch nung yimsüsüba nungi nüchiso ngur Indonesia küm 78 jungogo. Jakarta kübok Ancol Beach nung iba benjong temaitsü 'greased-pole climbing competition' ya ayongzuka liasü.

Malaysia tayimtsü ka tsükok, nisung 10 asü

Kuala Lumpur, Luroi/August 17 (Agencies): Malaysia indang central Selangor state kübok yimtung nung Brestostibarnü tayimtsü tilaka tsükoka tayimtsü nung mena alir nisung ti aser ali nung gari nung senzür ana asü, ta yangji aliba police tekolakbai ashi.

"Tang tashibo iba tayimtsü tsükokba nung nisung 10 süogo ta shiteter. Gari nung mena alir ana - ka gari nung aser ka motorcycle nung - aser tayimtsü nung mena alir nisung ti külemi asü," ta Mohamad Iqbal Ibrahim-i ashi.

Tayimtsü nung mena alir asürtem rongnung central Pahang state nung state assembly züngsem aser Housing and Environment in-charge Johari Harun densema lir, ta police-i ashi.

Tayimtsü tsükokba mapang passenger trok aser tayimtsü ketdangsur ana liasü, ta Malaysia indang civil aviation ketdangsur temi sangdong ka nung ashi saka parnokitelemeteba indangbo mashi.

Iba tayimtsü ya northern resort island, Langkawi nungi apuso aser Kuala Lumpur anüolen Sultan Abdul Aziz Shah Airport bushia aorba liasü, ta civil aviation ketdangsur tekolakba, Norazman Mahmud-i ashi. "Teyari nungdakba osang kecha maru," ta pai ashi.

Air Accident Investigation Bureau ajanga iba lendong indang bushisüngdangtsü, ta pai ashi. Malaysian air force nung taoba mapang züngsema alir Mohamad Syahmie Mohamad Hashim-i ashiba agi, pai iba tayimtsü ya yimya meshidak nung yima aoba angu. "Mapang tatsüka lir ola tulu adoka apokba ni angashi," ta pai osangbener dang ashi.

"Ni iba tesem leni arsanga ao aser tayimtsü teraksa angu. Yangji mi jangrua alidak nisung tasümgang ka angu. Saka ni kecha meinyaktet," ta pai ashi.

Ano nisung kari ashiba agi Beechcraft Model 390 ya Shah Alam anasa Elmina Estate nung alua ali nung atsükdang mi adoka apok, kong nisung aliba ki aser factory tem lir.

Taoba mapang Twitter ta ajaba X amshir kati video tatsüka lemsatepba nung iba tayimtsü tsükokba tesem nungi mi aser mokozi tanak adoka liasü. Ibaji müketa aser nisung aliba ki anasa jana prokshia liasü.

September 1977 nung Japan Airlines tayimtsü ka Singapore leni aodang housing state ka nung tsükoka nisung 45 takum kumzük aser 34 asü.



Haiti nung Port-au-Prince kübok Carrefour-Feuilles district nung mapa tamajung inyakba telok balala tsüngta raratepba ajanga nüburtem pei ki yutsür jena aoba noksa nung angur. Carrefour-Feuilles district nung telok balala tsüngta azüdokshiba ajanga yangji alirtem tetsübo nung pei ki yutsür tesem balalai jena aor.

MELENSHITSÜR
 Mother's Day/Father's day mesüra Mothers' day/Fathers' day indang Tir Yimiyim, 17th August 2023 nung adokba Ocet nungji aibelenba (inadvertent mistake) ka yamai melenshitsür:
 TATEM O : - Sülen zülua aliba oren (sentence) tanabuba nungji MOTHER'S DAY/FATHERS' DAY melena-ji MOTHER'S DAY/FATHER'S DAY ta amshi nung jungdisü? ta zügangma.
 Sd/-
 Ocet Zülur. Date – 18.08.2023

IndianOil
 CIN: L23201MH1959G0011388
 Marketing Division - Head Office
 Ito notice toh Expression of Interest karoni invite kora laga ase (EOI)
 NIT No./ Name of work
 Ref. No. HO/MSG/EOI/EVCS/2023-24
 SUBJECT: ITO EXPRESSION OF INTEREST (EOI) TOH, KONOKA POTENTIAL PARTNERS/MAHOLEHBIH AGENCIES KONOKA ELECTRIC VEHICLE CHARGING STATIONS (EVCS) PUBLIC JAGA DEY, KAM KORA JAGA DEY, MANU THAKA GHOR COMPLEX KHAN DEY ARO HUBS AREA DEY KORIBOLEHMON THAKILEYH KOIKENA SHORT LIST KARONI INVITE KORIASA.
 Downloading laga time:
 18.08.2023 dey 11:00 Hrs dey shuru koribo
 11.09.2023 dey 15:00 Hrs dey khotom hobu
 Contact Person: I.Aravind
 Email id: aravindi@indianoil.in
 Contact No: 022-26447582
 Ito website <https://ocletenders.nic.in> dey tender documents Khan download korikena e-tenders deboleh karoni participate koribhi
 Note: Jodi konoba beshi add koribole/maholeh bhi corrigendum/sale date extension Khan ito tender karoni thakisho koiletoh, sop ito website <https://ocletenders.nic.in> dey hei debo aro eko alak korikena notification press kei nadibo. Ito karoni bidders Khan time dey website dey jaikena update koribhi.

Wozniacki, Venus & Isner nunger nem US Open wildcard agütsü



Caroline Wozniacki

Venus Williams

John Isner

Luroi/August 17, 2023 (Agencies): Taoba mapang World No 1 asayar Caroline Wozniacki aser Grand Slam kija asayar tenetben tashi koker alila Venus Williams na US Open atema wildcard agütsürtem rongnung densema lir, ta US Tennis Association-i metetdaksü.

Taküm atema tatembanbuba Grand Slam asayamung asoshi tebur kija asaya nung US nunger asayar John Isner nema wildcard agütsüogo. Iba asayamungya New York nung August 28 nungi tenzuka asayatsü.

Arishi küm 33 tain Wozniacki, shiba 2020 Australian Open sülen asaya nungi anena liasü la tawa ano asaya tenzükogo aser tang mezüngbuba Grand Slam ka asayatsü lir. La lar kibong nem mapang agütsütsü asoshi asaya nungi anena liasü saka iba ita

nungi asaya tenzükogo.

2018 Australian Open champion ya 2009 aser 2014 küm US Open runner-up liasü.

Kasa mapang nung arishi küm 43 tain Williams, Flushing Meadows nung tang agi 24benbuba asayatsü lir. Lai iba asayamung ya 2000 aser 2001 küm atonga koka lir.

Grand Slam kija asaya 23 tashi koker alila Serena Williams teyi, shiba taküm yiruba ajanga ita trok tashi masayai liasü, la grass-court nung asayamung balala asayaba mapang maneni asaya tenzük aser iba hopta Cincinnati nung mezüngbuba lai top-20 nung aliba asayar ka kokogo.

Maneni arishi küm 38 tain Isner, 2007 küm asaya tenzükba sülen US Open main draw nung khen danga methei asaya arudar aser taküm 17benbuba asayatsü lir. Grand Slam nung

pai 2018 küm tajungtiba asayateta Wimbledon semi-finals tonga asaya liasü aser US Open nung pai 2011 aser 2018 küm quarter-finals tonga asayaogo.

America nunger Steve Johnson-a taküm agi US Open main draw nung 13benbuba atonga asayatsü aser kasa mapang nung Michael Mmoh nema wildcard agütsüogo.

US Open wildcard anguba tanga tetsür asayartem rongnung America tsür Ashlyn Krueger, Robin Montgomery, Kayla Day aser Clervie Ngounoue den Australia tsür Storm Hunter aser France tsür Fiona Ferro na densema lir.

Teburtem rongnung ano US nunger asayar Learner Tien, Alex Michelsen aser Ethan Quinn nunger den Australia nunger asayar Rinky Hijikata aser France nunger asayar Benjamin Bonzi na densema lir.

ISSF World Championship: Shiva, Sarabjot, Arjun nungeri bronze angu



Luroi/August 17, 2023 (Agencies): India tebur 10m air pistol team nung Shiva Narwal, Sarabjot Singh aser Arjun Singh Cheema nungeri tang Baku nung asaya aliba ISSF World Championship nung India atema mezüngbuba medal nguogo. Parnoki aseme iba asayamung Bronze medal ngu liasü.

ISSF World Championship ya Baku nung Brehostibarnü nungi tenzuka asayadar.

Asaya nung Narwal-i point

579, Sarabjot-i 578 aser Cheema-i 577 nguua parnok asem senteper point 1,734 nguua liasü. Parnoki silver medal anguba Germany team point teku agi memenep shirnoki point 1,743 nguua liasü.

Tebur 10m air pistol team tetoktepbba nung China-i gold medal nguua liasü. Team nung asayar Bowen (587), Liu Junhui (582) aser Xie Yu (580) nunger senteper point 1,743 nguteta gold medal nguua liasü.

German team nung Robin

Walter (586), Michael Schwald (581) aser Paul Froehlich (576) nungeria ajak senteper point 1,743 nguua silver medal nguogo.

World Championship ya 2024 Paris Olympics atema qualification asayamung ka lir.

Ajisüaka India nunger asem rongnung kati danga asayar ti asayaba final tongteta masayatet aser par asem kija asaya nung medal angutsü asoshi kecha timla mali.

ODI asaya 3 atema New Zealand-i Bangladesh semdangtsü

Dhaka, Luroi/August 17 (Agencies): September aser November ita ODI aser Test asayatsü atema küm 10 sülen tang mezüngbuba New Zealand team-i Bangladesh semdangtsü.

ODI asaya asem asayatsü aliba ya team anaprongla atema India nung asayatsü aliba World Cup atema renemshiba asayamung ka asütsü.

World cup ya taoba edition runners-up New Zealand aser defending champions England na 2019 küm final asaya ama Ahmedabad nung asaya tenzüktsü.

Kasa mapang nung Bangladesh pur World Cup nung mezüngbuba asaya Afghanistan den October 7 nü Dharamsala nung asayatsü.

Bangladesh Cricket Board-i Brehostibarnü sangdong ka ajanga ashiba agi, iba

asayamung ya September 21 nü tenzüktsü. ODI asaya asemprongla Mirpur nung Sher-e-Bangla National Cricket Stadium nung asayatsü.

Maneni Test asayamung ya World Cup tembangba sülen November ita tatemlen asayatsü renema lir. Test ana asayatsü aliba tesem ya mapang tatsüka lir sangdongtsü.

Iba asayamung nung tanabuba shilem ya ICC World Test Championship cycle nung shilem ka asütsü. Reb ball asayamung ya World Cup tembangba sülen asayatsü.

New Zealand team-i tatemsa 2013 küm Bangladesh semdanga liasü.

Iba asayamung nung test asaya ana draw asü aser ODI asaya Bangladesh-i 3-0 agi koka liasü. Iba sülen T20I asaya ka ya New Zealand team-i koker iba asayamung tembanga liasü.

Ben Stokes maneni ODI nung asayatsü



Luroi/August 17, 2023 (Agencies): Ben Stokes one-day international (ODI) cricket asaya nungi anener liasü saka India nung taküm World Cup masaya tsüngda maneni ODI nung asayatsü atema telemteba agiogo, ta linük cricket board-i metetdaksü.

England Test captain ya New Zealand den taruba ODI asayamung atema squad nung süngoksemba national selector Luke Wright-i Bodhbarnü metetdaksüogo.

Stokes-i ODI format ya ita 13 tejakdang tokja liasü. Format ajak nung asayatsü khuret tali akümba aser pa temekok tabelen yirua dang aliba ajanga ODI nung masayatsü atema telemteba agia liasü.

Pa tetsüng nung timtem aliba ajanga tawa Australia den asayaba Ashes asayamung nung tatembangbuba Test asaya asem nung pa bowling moni liasü.

Ajisüaka October ita nungi tenzuka asayatsü aliba WC nung Stokes ya specialist

batsman ka ama asayatetsü, kong parnoki iba asayamung tanaben akoktsü merangtsü.

Arishi küm 32 tain Stokes ya 2019 World Cup final nung Player of the Match liasü. Pai final asaya nung out mesüi run 84 yanglua New Zealand super over nung akokba asaya nung teyari tulu agüja liasü.

Paisa, taoba küm Melbourne nung Pakistan den T20 World Cup final asayaba mapang out mesüi run 52 yanglua aser tatembangbuba run pai yanglua liasü.

England aser New Zealand na taruba ita ODI pezü asayatsü lir.

White-ball coach Matthew Mott-i taoba mapang, ODI team nung Stokes pelashishia züngoksemtü ta shir liasü.

2011 küm Ireland den mezüng asayaba sülen Stokes-i ODI 105 nung asayaogo. Iba mapang pai century asem densema run 2,924 yangluogo. Paisa, wicket 74 agiogo aser pa fielder tem rongnung tajungtiba ka lir.

BILEMDANGANG
"Memerangdangra akoktsü makoktsü mejangjatsü."